















A D V I S
A
M O N S E I G N E V R
LE PRINCE.

M. D C. XIV.

Case

F

39

326

A D V I S

A

16/4/91

MONSIEUR
LE PRINCE
THE
LIBRARY

M.D.C.XIV.

A MONSIEUR LE PRINCE.

LE PRINCE.

MONSIEUR,

C'est maintenant que la France
sousepire, puis que ses esperances
sont auortees; d'autant qu'elle a
creu iusques à ce iour que ses le-
gitimes enfans ne seroient si des-
naturez que de deschirer son
corps pour la corruption de quel-
ques membres; & que ceste cor-
ruption seruiroit seulement de
pretexte pour y appliquer le baul-
me salutaire. Sur ceste croyance
elle a fait que les vrais François
sont courus vers ceux qu'elle iu-
geoit capables de sa guerison:
mais recognoissant que leurs pre-
paratifs ne se faisoient pour son

vtilité, ils se sont retirez, conuer-
 tissant leurs vœux en impreca-
 tions. Toute la France croyoit
 que vous, Monseigneur, & ceux
 qui vous assistent, voulussent sui-
 ure les desseins de nostre grand
 & inuincible Henry; & que pour
 diuertir en effect l'alliance d'Es-
 pagne, tousiours funeste à la Frâ-
 ce, d'eussiez porter les armes con-
 tre son ennemy naturel, luy fai-
 sant resentir les outrages nouuel-
 lement faites à la Nauarre, ancien
 patrimoine de nos Roys, & que
 l'amas de vos troupes en Cham-
 pagne, feust pour auoir plus de
 facilité à surprendre quelques pla-
 ces sur la Conté de Flâdres, pour
 en donnant echet à la descouuer-
 te, attirer à vous toutes les forces
 de France, qui n'eussent manqué
 de vous assister. C'est chose que

vous pouuiez, Monseigneur, & pouuez encores faire sans blasme ny reproche, ny sans rompre la paix qui est entre nostre Roy tres Chrestien & luy : estant du droit de l'espee des Princes la conqueste des pays vsurpez ; & en vous faisant Conte de Flandres en rendre l'hommage à la France, contenter vos amis & alliez des terres dont ils portent le tiltre, & leur en affermir la possession. Action certes beaucoup plus genereuse & louïable que de firriter contre soy-mesme, & deschirer ses propres entrailles pour ne pouuoir souffrir la vieille pourriture de quelques membres aisez à retrancher. Vous seriez le bras droict de la France pendant la minorité de son Roy, & donneriez vie aux genereuses esperances qu'elle a

conceuës de vous, vous retrans-
cheriez alors en toute seureté &
sans violence les parties vlcerees
de ce grand corps; le rendant en-
cores plus sein qu'il n'estoit du
viuant de nostre deffunct Roy.
Quelques enuieux & broüillons
qui n'auront desir que de s'ac-
croistre des ruines de cest Estat,
ou de se vâger de leurs ennemis,
dirôt que ce dessein est fort beau
en papier, mais difficile à l'effect.
A ceux-là ie responds que l'effect
est plus facile que ce qu'ils vous
conseillent: d'autant que Dieu
iuste defenseur des Roys, des ves-
ues & mineurs, renuertera leurs
conseils. Et pour preuue de mon
dire, l'Archiduc est au liët mortel
sans eufans, sans moyens pour
maintenir son Estat s'il estoit at-
taqué des gens de guerre mal-

contens . Le Roy d'Espagne à
qui la Flandre retourne, si neces-
sitaireux qu'il perd credit: Et de plus
forcé de faire vne grande despen-
ce pour conseruer la Sicile que le
Turc menace: de sorte qu'il ne la
peut secourir de ses forces &
moyens . Vous serez assisté de
toute la France, des Estats d'O-
lande, & de tous les Princes voi-
sins qui enuient la grandeur d'E-
spagne: Bref la guerre nourrira
la guerre en pays de conqveste.
Et quand vous ne feriez que tes-
moigner à la France, que n'avez
pris les armes pour la ruiner, ains
pour l'acroistre. Vous vous ren-
drez immortel en gloire, hōneur,
& bien-veillance enuers tous les
François, qui prieront Dieu pour
vostre prosperité.





















